

Kipindji kya 12 : MUFUBO MU KAKONGYE NA BAKULU

Twibabangye kutusha mweneno na mbangilo a kakongye na kulesha kwiwisha kwetu pa kwibunga mu kakongye booso pamune na nabyo namu muyile kukumiina kwa Fumu.

Kikudi-E-Selele kifikye bu mukunkushi na ku ludika mu kakongye. Kipindji kya uno mufubo wutumikibwe kwi batumibwe bwa kutuula mbangilo bibaadi pa mwanda wa kutuula myanda mu yoso milongo mu tukongye. Mutumibwe Mpolo baadi mukwashe ku wawa mufubo bikata. Byatudi'shi twi bena kukumiina bakumiine miya ya mu kilombeeno kipya, abitungu twate na kineemo bisaka bibidi bya ba bantu bya tusangana mu kilombeno kipya. Atukataluula kalolo kisaka kyakumpala mu kino kipindji na kisaka kya kabidi mu kipindji kya 13. Mu kipaso kya kulesha kwilekeena kwa bishima bimune mu kilombeeno kipya na ngakwilo ebinobino a byabya bishima, atutaluula mu kino kipindji mufubo wa muntu abayitanyina bu: **Mukulu a kakongye.**

Mufubo wa mukulu a kakongye.

Kino kishima akipatuula kini ? Atusangana'shi mu ingi mpatulwilo ya mu kilombeeno kipya bishima bisatu byoso abyakula bwakulesha muntu umune : « *Episkopo, Muludiki, Mukulu* » bino bishima bibidi bya kumpala mbifikye mu kishima kimune kya mu kingidiki « *Episkopo* » (Talayi mu mukanda wa Mikitshino 20 : 28) na kino kishima kyafudiilo kilekeene « *Presbuteros* » anka akyakulwa kwi muntu umune, tutaluleeyi mu bino bishingatshilo bibidi bya mu mukanda wa Mikitshino 20 : 17 na Mikitshino 20 :28. Kishima « *Episkopo* » akipatuula'shi : **ku tala** suunga'shi kulama, bwa'shi tupushe'shi kishima « *Mukunkushi* » kikale kyakulwe. Pangi twibakumbeene kutusha kwilekeena kwi pankatshi pabino bishima bibidi na kwakula'shi : « *Episkopo* » akilesh'anka muntu, anka « *Mukunkushi* » akilesha mufubo awufubu muntu, na « *Mukulu* » akipatuula kukula mu kikudi kyukilo, bukalabwino, na kutundula kwa baaba bena buno bushito suunga matalwa.

Ku mbangilo, mutumibwe baadi mutule bakulu mu kakokongye koso (Mikitshino 14 :23). Timote baadi mutambule mukanda ubaadi bwa kumutuula bu mukulu a kakongye, na kumupa matalwa a kufuba a kukita mufubo bu mukulu a kakongye na bu muleshi a mpala ya mutumibwe, anka dingini bu Tite bwa kufuba na kuwuka'shi mu tukongye toso mubaadi bakulu ba kakongye. (Tite 1 :5) ; anka, kubanga mafuku a mutumibwe na baleshi ba mpala baaye babidi, tukongye tubaadi tupete bukalabwino. Binobino tatwina batumibwe bwa kutuula bakulu nya ; anka Kikudi-E-Selele akifubu mu kakongye, akikunkusha baaba abakitshi mufubo wa bakulu.

Patukatuka mu kakongye na kwenda mu kangi kakongye, atukatundula baaba bena yaaya mbalo, byabya twina bena kukumiina abakitshi mufubo wa kukunkusha suunga bu bakulu, suunga'shi kyakya kitenta takikwete

kufubishibwa. Bibuwa kuwuka'shi, bano abakitshi byabya, abebikitshi penda bu mudimo mu kakongye. Twikeele bamone kumpala'shi takwi bitenta nya, suunga bakunkushi ba tukongye nya. Anka penda Fumu Yesu aye nabeene.

1 Mpyele 2 :25 : etutentekyesha bino : « *mwanda nubaadi bapambukye bu mikooko, anka binobino nubaaluka kwi mulami na mukunkushi a bikudi byenu.* »

Mutumibwe Mpolo, alesha Timote'shi yawa akimbi kwikala mukulu a kipwilo, adidi mufubo wibuwa. Mutumibwe Mpyele akula dingi « *kwi bakulu bemukatshi mwenu... lamayi lombe lw'Efile-Mukulu, lwanudi batulwe bu balami, kushi mpaka anka na kukumiina koso, kushi bwa kupeta bu efuto dii bufu, anka n'eshimba di selele* ». Mbikumbane, bwa'shi kwikale bukalanga na myanda ilondeene milongo mu tukongye. Mu myanda yoso, tabilombeene kukita mufubo na bukyelo, anka akumweneka ingi saa ya kwakula n'eyi ditale, pangi elango dibukopo, byoso bikitshikye na bikumbaswe muyile eyi dy'Efile-Mukulu, na kepatshila ka kutuula kwilondeena kwa myanda na bukunkushi bwa kakongye mu ndumbulwilo pa mwanda wa ntumbo ya Fumu.

Bifundwe abilesa bantu bebungi babaadi abakitshi uno mufubo mu tukongye. Tatwibasangane kileshesho suunga kimune akilesha'shi anka penda muntu umune baadi akitshi uno mufubo, mwanda byabya abikyebe kwata mbalo ya bu mutwe wa kakongye wikale Kilisto nabeene. Bakulu tabena kiteka kikampanda kya Kineeno mu kakongye, anka batundudibwe ku mufubo wa bakwete kukita. Bino bangi bena kukumiina mu kakongye bakumbeene kwibateka kyabo kya bapwandjikisha, kwisamba ingi myanda na kupeta malango. Na mutumibwe Mpolo alesha Timote: « *Baakulu abakitshi kalolo mufubo wabuludiki, mbalombene kineemo misuusa ibidi; bikishekishe baaba abafwambuka ku mufubo wa mukandu wibuwa na bulambukishi* » 1Timote 5:17. « *Kukunkusha* » akupatuula'shi kwata bushito bukata, bwa mukulu ena kyakulumbula bikitshino byaye kwi Kilisto Fumu. Atubadika mu mukanda wa bena Ebeleo 13:17 « *Kokyelaayi bakunkushi benu na yikalaayi beyishe, mwanda bakwete kukutwa tulo pa mwanda wa bikudi byenu, anka bu bantu bena ebasa, byabadya kwibikita na muloo, anka kushii na miyalasheeno, mwanda byabya tabikeekala na bukwashi kwanudi nya* ». Anka mbikile buwa baaba abakitshi uno mufubo mu kakongye bewukite kalolo na kepatshilo kamune bwa makasa a Fumu.

Milongo yibakidi tumwene'shi mufubo wa bakulu ba kakongye mbwa kutuula bintu byoso mu milongo ilondeene na nshalelo ibuwa mu kakongye na baaba abata buno bushito abebusemuna kumpala a Fumu na mbakumbeene kineemo.

Mufubo wa bu mukulu nta mufubo wa muntu umune mu kakongye nya. Apalesha kilombeeno kipya pa mwanda **wa bakulu**, anka ku bungi, byabya ku bupenka bwa kulesha penda nshalelo a mukulu.

Nshalelo a mukulu a Kakongye.

Atwiyisangana ngifundwe mu mukanda wa 1 Timote 3 na mu mukanda wa Tite 1, atukataluula bino bipindji bibidi. « *Dino eyi ndi'eyendo'shi su muntu akimbi kwikala mukulu a kipwilo, adidi mufubo wibuwa abitungu'shi mukulu ekale shatopekiibwa, mulume a mukashi umune, sha budimu, sha bukalabwino, akunemekibwa, akutambula beni, mulombeene kulambukisha, shi mwipaane ku maalwa, shalwiya ngoshi, anka mupopeele, shina tulewo, shina kifulo na fwalanga, aludika shibo yaye kalolo, ena bana baye abamukokyela na mu kwinemekyeshena. Anka su muntu tawuuku kuludika shibo yaye, aka kunkusha kakongye k'Efile-Mukulu namini? Tekalanga muntu mukumiine binobino, kupela'shi tala awushiibwa na kwitatula, na apona mu kilubilo kya dyabulu. Abitungu namu'shi eekale kitelulwiilo ki buwa kwi baba ba pasha, kupela'shi tala akapona mu buufu na mu mutewo wa dyabulu » 1 Timote 3:1-7. Mutumibwe akula kumpala mwanda wa muntu « *akimbi kwikala bu mukulu a kakongye* » bu muntu adidi mufubo wibuwa. Muloo kini, kwi Fumu apamweneka bantu abakumiina kusemuna buno bushito pa mwanda waye. Patutaluula kalolo mu bino bishingatshilo, atupusha tubingilo twa kino kishima « *Mukulu* » bwa kukumbasha uno mufubo: Ekale muntu ena kyukilo kya mu kikudi na bukalabwino.*

Mukulu mukumbeene kwikala muntu:

Shatopekiibwa: tambikumbane bwa'shi bangi bantu bafika ku kakongye na ku mufunda bwa myanda ibii. Byabya tabimupa kineemo nya.

Ekale Mulume a Mukashi Umune: Mu mafuku a kilombeene kipya, bangi babakumiinine babaadi na bakashi bakile pa umune, babaadi batambulwe mu kakongye, ta babaadi batulwe ku mufubo wa kuludika myanda ilondeene milongo mu kakongye nya. Mbikumbane'shi baaba betanyinibwe bwa kukwasha bangi bekitshishe byabadya kwibikita na kupopeela na mu kwiyaisha.

Shabudimu: atomo na kudya mwishinky. Kino kishima akileshe bwa kwikala na kinangu kya budimu;

Sha bukalabwino: Shiina bwakulakule, mupwidikye.

Atambula Beni: Kino kishima akipatuula kwikala na kifulo na beni; paano nyi pakulesha kifulo na kupudisha ku byabya byadi nabyo lukalo.

Mulombeene kulambukisha: Suunga'shi tamwikale mupatuudi a bifundue, ekale awuku kuteluula na kulambukisha bifundwe na kisukusuku kya kulambukisha.

Shi mwipaane ku maalwa: Kwipaana ku maalwa akufwisha tulewo, bishii buwa munkatshi a kakongye; Nkindji 20:1 « *Maalwa a nfinyo aekasha muntu na kasaabu, malwa oso namu aasawula ewunga; byabya, booso abakolwa ta bena binangu nya* ».

Shalwiya ngoshi: Kikudi kya butaale kibuwa.

Mupopeele, shina tulewo, shina kifulo na fwalanga, na shakimbaa fwalanga mu kipaso kilube.

Aludika shibo yaye kalolo: Ena nshalelo ebuwa na kifuko kyaye ki n'aye kifulo, na kina lukalo lwa kumusankisha; Buwa kini su ebu kileshesho kibuwa mu kakongye.

Tekalanga muntu mukumiine binobino: Muntu ata bushito kushi kwikala na bukalabwino akekala na kwitatula, tabikekala na bwedi ku kakongye).

Ekale na bukamoni bwi buwa kwi bantu bapasha: Ekale muntu ena kineemo kwi bashii bena kukumiina. Su ta mbyabya akekala na bufu ku mufubo wa Fumu.

Su atubadika kalolo mu mukanda wa Tite 1:7-11 atupete bipindji abileshe ngikashi ifwaneene, bitungwe bwa'shi kubadika. Mpolo alesha'shi kwikala shina matope kwamba'shi: kukita bibuwa suunga myanda ikumbane muyile bu mulami a bya buntu Efile-Mukulu. Atusangana dingi mushindo wakwikala wi buwa « *balamate kw'eyi* » ku byabya atutenteka dingi ku bino « *ena bukokyeshi bwa kulongyesha* », mu mukanda wa Timote wa kumpala, atumono'shi bikile buwa kushadidiila mu byabya abileshe eyi dy'Efile-Mukulu.

Uno mulongo wibula na awulesha nshalelo ayimweneka kwi baaba bena mwikelo ulombane na upwidikye, kupopeela na kifulo. Atupusha kalolo shi mu kakongye abawuku baaba bena kukumiina be byabya; abapaa Fumu kineemo na bena muloo mwadi. Anka bina muulo ukata bwakuwuka'shi matalwa akukita byabya bu mukulu a kakongye aafiki kwi Fumu aye ebu mutwe wa kakongye. Atusha bya buntu naye suulo y'eyendo, ya aa matalwa. Kakongye ke kwamba'shi muntu shalesha ino nshalelo tamukumbane kwikala bu mukulu mulombane na tamwitanyinwe na Fumu bwa kulama lombe lw'Efile-Mukulu. Suunga tatwi betanyinibwe bu bakulu ku mufubo wa bu mukulu a kakongye, twi balombeene kukita byoso bwa'shi twikale na ngikashi ayikyebe Fumu kumona kwi muntu oso akwatudi.

Kino kipindji kya kano kakanda: 12. Kyaluulwe mu Kisongye mu Kabinda, mweshi wa kitema (9) mu kipwa kya 2025 kwi bakwetu bano : **Arthur NYINDU ASSANI**, na **Esther KIMANKINDA YANGONGO**.